

SEGUNDA CARTA DEL APOSTOL SAN PABLO A TIMOTEO

1 ¹Wejrtĉha Pablutqui. Yooz muñañpi jaru Jesucristuž illzta apostoltĉha. Yoozqui Jesucristuž cjen žoñinacžquiz taku tjaachiĉha, Jesucristužquin kuz tjaañi žoñinacžquiz wiñaya arajpachquin kamkatzjapa. Jalla nii wiñaya kamz puntuquiztan paljayajo wejrqui apóstol puestuquiz uchtitĉha. ²Timoteo jila, amqui wejt k'ayi maati cuntamĉha. Jalla nekztanaqui tii cartal cijjrĉcuĉha. Uĉhum Yooz Ejpžtan nižaza uĉhum Jesucristo Jiliržtan, jalla ninacaqui amquin zumaj yanapla, nižaza amquin okžla, nižaza zuma cuntintu kuzziz kamkatla.

TIMOTEOŽQUIZ CHIIŽINTA TAKU

³Wejrqui majiñami weenami Yoozquin mayizican, am cjuñuĉha. Am cjuñžcu, wejrqui amiž cjen tirapan Yoozquin sparaquiž cjiwĉha. Yoozquin tjapa kuztan ligituma sirwuĉha. Jaknužt wejt tuquita atchi ejpnaca Yoozquin zuma sirwitĉhaja, jalla nuž Yoozquin sirwuĉha. ⁴Wejrqui cjuñuĉha, amiž wejtquiztan kaazniž cjen. Nižaza wilta am cherz anchal pecuĉha. Nekztan cuntintul cjeeĉha. ⁵Nižaza cjuñuĉha, amqui tjapa kuztan Yoozquin criichamĉha, jalla nii. Primeraqui am Loida cjiti matilliqui

Yoozquin kuzziz cjissintaĉha. Nekztan am Eunice cjiti maa Yoozquin kuzziz zakaz cjissintaĉha. Nižazakaz amqui ultimupan Yoozquin kuzziz cjissamĉha.

⁶Yoozqui amquiz tsjii zuma kamaña tjaachiĉha, weriž am juntun kjaržtan lanžtan. Jalla nižtiquiztan amquin chiižinuĉha, nii zuma kamañquiz tira kamajo. ⁷Yoozqui uĉhumquiz eksni kuzziz ana cjiskatchiĉha. Antiz tjup kuzziz cjiskatchiĉha, nižaza zuma munaziñi kuzziz cjiskatchiĉha, nižaza zuma pinsiñi kuzziz cjiskatchiĉha.

⁸Jaziqui amqui anapanim azaquiĉha, uĉhum Jesucristo Jilirž favora paljaycan. Wejrqui Jesucristuž cjen carsilquiz chawjctitĉha. Jalla nuž cjenami amqui ana wejtquiztan azaquiĉha. Amqui Yooz zuma liwriiñi taku paljayniž cjen zakam sufriĉha. Nii sufrisquiztan ana jiwjatalla. Yoozqui amquiz azi tjaažcaquiĉha tjurt'izjapa. ⁹Nii azi tjaañi Yoozza uĉhum liwriichiĉqui. Nekztan uĉhum kjawziĉha nižquin tjapa kuztan kamzjapa. Yoozqui uĉhum ana kjawziĉha uĉhumnacaž zuma paatiquiztan. Antiz Yoozqui uĉhum kjawziĉha niž persun kuz munañpi jaru, nižaza niž persun okžni kuzziz cjen. Ima tii muntu želan Yoozqui tantiichiĉha, Jesucristužquin kuzziz žoñinacžquiz niž okžni kuz

tjeeznaquičha, nii. ¹⁰ Jazizti Yoozqui uŕhum Liwriiñi Jesucristuž tjonchiž cjen niiž okzñi kuzziz tjeeziča. Jesucristuqui ticz liwј atipchiča persunaltajapami nižaza niižquin criichi žoñinacžtajapami. Nižaza liwriiñi Yooz taku paljaytiquiztan, jaknužt žoñinacaqui Yooztan wiñaya kamčhaja, jalla niiqui kјanzt'itača.

¹¹ Jalla nii zuma quintu paljayajo Yoozqui wejr utchiča apóstol puestuquiz. Nižaza wejr utchiča ana judó žoñinacžquiz tjaajnajo. ¹² Jalla nižtiquiztanpacha wejrqui ancha sufruča tii carsilquiz chawјckatzcama. Jalla nuž cjenami wejrqui anapan azuča, werar Yooztan tsjii kuzziz cjen. Werar arajpach Yoozquinpanž kuz tjaachinča. Nižaza tuž cjiwčha, wejt Yoozqui walja azzizza. Jaziqui niiqui weriž cumpjiita wira cuitaquiča Jesucristo tјonz tjuñicama. Jalla niiča zuma werar razunaqui.

¹³ Werjqui amquiz zuma tjaajinchinča. Jalla nii tjaajintacama amqui tirapan tjapa kuztan kamaquiča. Yoozquin kuzzizpan cjequičha, nižaza žoñinacžtan zuma munaziñi kuzziz cjequičha. Jalla nuž kamaquiča Jesucristužtan tsjii kuzziz cjen. ¹⁴ Yoozqui amquin niiž zuma tjaajintanaca tjaachiča. Jalla nii zuma taku cuitaquiča. Učhum kuzquizpachača Espíritu Santuqui. Jalla niiqui amquiz yanapaquiča nii Yooz taku zuma liјituma tjaajnajo.

¹⁵ Tјapa nii Asia provinciquiztan tјonchi žoñinacaqui wejr zinalla ecchiča. Jalla ninacquiztan Figelo, nižaza Hermógenes, jalla ninacaqui wejr ecchizakazza. Nii zizza amqui. ¹⁶ Onesiforožti ancha wejr kuzziča wiltan wiltan. Nižaza weriž carsilquiz chawјctaž cjen ana azziča. Jalla nižtiquiztan zuma okzñi kuzziz Yooz

Jiliriqui niižquiz zumaj yanapla, niiž familianacžtanpacha. ¹⁷ Roma cјita wajtquiz želan, nii Onesíforo jilaqui wejr ancha kjurchiča zalañcama.

¹⁸ Jesucristo Jiliriž pјalz tjuñquiziqui Yooz Jiliriqui nii Onesiforožquin okzñi kuzziz cjequičha. Efeso wajtquin želan, Onesiforoqui jaknužumi criichi žoñinacžquin yanapchiča, jalla nii amqui zuma zizza.

JESUCRISTUŽ ZULTATUŽTAKAZ CJISPANČHA

2 ¹ Timoteo jila, wejt maati cuntamčha. Tјup kuzziz cjee. Jesucristuqui amquiz yanapaquiča. ² Wejrqui walja žoñinacaž želan Yooz taku tjaajinchinča. Ninacžtanpacha amqui weriž tjaajintanaca nonzamčha. Jalla nii tjaajinta takunaca amqui tjaajnaquičha zuma cumpliñi kuzziz žoñinacžquizimi. Nekztan nii žoñinacaqui yekјanacžquizimi tjaajnasacha.

³ Amqui Jesucristužquin sirwiñiž cjen sufraquiz niiqui, nii sufrizquiztan ana јiwјata. Jalla nuž sufrican, Jesucristužquin tјurt'aquičha walja tјup zultatužtakaz. ⁴ Jakzilta zultatut servicio militarquiz žeјlčhaja, jalla niiqui militar asuntunacquiz tjapa kuz tjaacha. Ana panž civil asuntunacquiz kuz tjaasacha. Niiž comandantiž mantuquiz cјissa, nii comandantiž kuz wali cuntintu cјiskatzјapa. Jaziqui zultat lii јaruž kamčha, anapanž civil lii јaruž kamčha. ⁵ Jalla nižta irata јakziltat pelota uzinčhaja, pelot uzinz lii јaru uzintančha. Ana pelot uzinz lii јaru uznaquiz niiqui, anapanž premio ganasacha. ⁶ Nižaza јakzilta langzñi žoñit zkala langžaja, jalla niiqui primeraž zkala čherquiztan lulasacha. ⁷ Jalla nii weriž čhiita puntuquiztan tantiya. Jalla nekztan Yooz Jiliriqui

tjapa nii puntuquiztan zumpachaž intintiskataquiča.

⁸Nižaza Jesucristuž puntu cjuñzna. Jesucristuqui David cjita tuqita jilirž majchmaatinacquiztan tjonñiča. Jesucristuž ticziquiztan jacatatchi puntu cjuñzna. Jalla nii liwriiñi takupacha paljajuča. ⁹Jalla nuž paljaytiquiztan wejrqui carsilquiz chawjcta sufruča, criminal žoñižtakaz. Jalla nuž weriž carsilquiz chawjcta želanami, liwriiñi Yooz takuqui anača chawjcta. Jalla nižtiquiztan Yooz takuqui tirapanž paljajtača. ¹⁰Jalla nižtiquiztan wejrqui walja sufruča Yooziž illzta žoñinacážquiz juc'ant wali cjiskatzjapa. Sufruča ninacami wejrmi ultimu liwriita cjisjapa. Jesucristužquiz kuzziz cjen ninacami wejrmi wiñayaž liwriita cjequiča, nižaza arajpachquin wiñaya honorchiz cjequiča.

¹¹Jesucristuqui učum laycu ticziča. Jalla niča ultim werar razunaqui. Učumqui tuqita ana wal kamañquiztan ticzi žoñinacážtakaz cjissinčumča, nii ana wal kamañquiz ana iya kamajo. Jaziqui ew kamañchiz cjissinčumča. Jalla nižtiquiztan Jesucristužtan kamča.

¹²Nižaza Jesucristužquiz sirwiñiž cjen sufračhaj niiqui, tjurt'ichi kuzziz kamz waquiziča. Nekztan tjurt'ichi kuzziz tirapan cjequiž niiqui, učumqui nižtan chica mantaquiča. Učumqui Jesucristužquiz nicaquiž niiqui, niiqui nižaza učum nicaquiča.

¹³Jaziqui učumž Jesucristužquiz criiz ana cumplichiž cjenami, nii Jesucristuqui tirapanž niž ecta taku cumplaquiča. Niiqui persun taku anapanž nicasača.

YOOZTAJAPA ZUMA LANGZPANČHA

¹⁴Amqui criichi jilanacážquiz nii puntu cjuñskataquiča. Nižaza

Jesucristo Jilirž tjuuquiz ninacážquiz zumpacha chiižinaquiča, jalla tužu: Anaž ch'aazaquiča ina žoñž takunac puntuquiztan. Jalla nuž ch'aazqui anaž čjuljapa sirwiča. Nižaza nii ch'aazta taku nonžni žoñinacaqui Yooz jiczquiz kamzquiztan tsjii kjutni chjichtaž cjesača. ¹⁵Amqui Yooztajapa tjapa kuztan langzna, Yooz yujcquiziqui zuma langzni žoñi pajta cjisjapa. Jalla nižtiquiztan Yooz yujcquiz žejlcan amqui ana čjulquiztan azasača. Nižaza Yooztajapa langžcan, niž werar liwriiñi taku legali paljaya. ¹⁶Ina žoñž takunacaqui anača chiižqu. Jalla nii ina takunaca chiyasaž niiqui, tsjan tsjan tsjii kjutni žoñinacážquiz irpaquiča. ¹⁷Nii ana wal chiižqu zuma kamañanaca ana wali cjiskataquiča, jaknužt tsjii laa cjiñi tjapa curpu ana wali ch'ujlkatčhaja, jalla nižta. Jalla nuž watchiča Himeneožtan Filetužtan, jalla ninacážquiz. ¹⁸Jalla ninacaqui werar Yooz tawkquiztan tsjii kjutni tsjemat taku parličiča, “Jacatatž tjuñiqui watchiča”, cjican. Jalla nuž chiiitiquiztan yekjap criichinacž kuznacaqui turwayskatžcu, Yooz jiczquiztan zarakskatchiča. ¹⁹Jalla nuž cjenami Yoozqu. Niižquin kuzziz žoñinaca yanapča tjurt'ini kuzziz cjejajo. Jalla nižtiquiztan Yooz icliz žoñinacaqui tirapan tjuraquiča. Jalla nii puntuquiztan Yooz takuqui tuž cjiča, “Yooz Jiliriui niž illzta žoñinacáž pajča”. Nižaza, “Tjapa Jesucristužquin kuzziz žoñinacaqui ana wal kamañquiztan zarakstanča”. Jalla nužupanča.

²⁰Tsjiilla cjesača. Tsjii ricach žoñž kjuyquiziqui tjapaman cusasanaca žejlča, korquiztan paata, nižaza paazquiztan paata, nižaza tabliquiztan paata, nižaza ljocquiztan paata,

jalla nižta cusasanaca žejlča tsjii kjuyquiziqui. Parti cusasaqui zuma visitanaca atintizjapa žejlča. Parti cusasazti zapuru kamzjapa žejlča. ²¹Jalla nižta iratača žoñinacaqui. Yooz Jiliriž atintizjapa, nižaza zuma honorchiz cjisjapa, zuma kamstanča. Nižaza nii ana wali chiiñi žoñinacžquiztan cuitasaquiča. Yooz Jiliržtajapa sirwiñipankaz cjee. Nekztan Yooz Jiliriqui am ocupasača. Nižaza listu cjesača čjul wali paazjapami.

²²Tjotjowanacaqui ana wali pinsizcu, ana wali ojklayasača. Amqui nižta anawali kamzquiztan cuitasaquiča. Yooz kuzcama kamaquiča, nižaza Yoozquinkaz kuzziz cjequiča, nižaza zuma munaziñi kuzziz cjequiča, nižaza parti žoñinacžtan zuma kamaquiča. Amtan tjapa Jesucristo Jiliržquin kuzziz žoñinacžtan zuma kamz waquiziča. ²³Nižaza zumzu ana zizñi žoñinacž ch'aaz puntunaca parlanaqui, ana mitisaquiča. Nii ch'aaz puntu parlaquiz niiqui, ultimupan juc'anti aptjapznasača. Jalla nii zizza amqui. ²⁴Jesucristo Jiliržquin sirwiñi žoñiqui anaž ch'aaz waquiziča. Antiz tjapa žoñinacžtan zuma munaziñi kuzziz kamz waquiziča. Nižaza zuma tjaajiñi kuzziz cjis waquiziča. Nižaza pasinziz kuzziz cjis waquiziča. ²⁵Nižaza Yooz tawk quintra žoñinacžquiz chiižinaquiča zuma humilde kuztan. Jalla nuž chiižinan Yoozqui cunamit ninacž kuz campiiskatačani, werar Yooz tawk jaru wilta kamažo. ²⁶Anziqui ninacaqui diabluž kjarquiz žejlča, tsjii presužtakaz, diabluž mantita jaru ojkszjapa. Amiž humilde kuztan chiižintiquiztan Yoozqui cunamit diabluž kjarquiztan ninacžquiz liwriita cjiskatačani.

ANCHA ANA WALI ŽOÑINACA ŽELAQUICHA

3 ¹Jalla tižta zakaz intintazkatz pecuča. Ima Jesucristuž tjonan ch'amaž cjequiča zuma kamzjapa. ²Žoñinacaqui persun kuzcama kamzkaz pecaquiča. Nižaza paazquiz kuz tjaaquiča. Nižaza persun honorchiz cjis pecaquiča. Nižaza mit kuzziz cjequiča. Nižaza Yooz quintra chiiñi cjequiča. Nižaza maa ejpž takunaca ana casñi cjequiča. Nižaza ana jecžquizimi sparaquiz cjiñi cjequiča. Nižaza Yooz kamañ puntu ana rispitaquiča. ³Nižaza ana okzñi kuzziz cjequiča. Nižaza ana jecžtanami zuma kamaquiča. Nižaza žoñinacž quintra takunaca joojowaquiča. Nižaza jaknužt persun kuz pinsičhaja, jalla niicama ojklayñi cjequiča. Nižaza žoñi sufriskatz pecñi kuzziz cjequiča. Nižaza zuma žoñinacž quintrapan cjequiča. ⁴Nižaza tarasuna paañi kuzziz cjequiča. Nižaza ana eksñiž malcreados cjequiča. Nižaza persun honorchiz cjis pecñi kuzzizkaz cjequiča. Nižaza persun kuzcama kamzquinkaz kuz tjaaquiča. Yooz kuzcama kamzquin anapan kuz tjaaquiča. ⁵Ninacaqui Yoozquin criichiž cuzturumpi jaru ojklayñiž cjenami, ultimquiziqui persun kamañ wira kaz paaquiča, anaž Yooz kamañ jaru cjequiča. Yooz aztan ana kamaquiča zuma kamzjapa. Jalla nižta kamñi žoñinacžtan anača ancha amigo pajasqui.

⁶Nižaza yekjapanacaqui nii ana wal kamñi žoñinacžquiztan maatakžtan kjuyquiz luz pecča, nii kjuychiz uj paañi maatakžquiz incallzjapa. Nižta maatakanacaqui uj paazquiztan ana atipasača. Nižaza juc'ant juc'ant ujchiz cjissa. Persun

kuz ana ewjasñi atcha. Jaziqui nii maatakanacaqui chjul ana wali pinsitanacz jaru ojklaycha. ⁷Zizñi cjis peccu, chjul tjaa jintanacami catokcha. Pero anawira werar Yooz taku intintazñi cjis atasacha. ⁸Jalla nižtakaztača pucultan yatirinacaqui, Janes cjita žoñžtan nižaza Jambres cjita žoñžtan. Jalla ninacaqui Moisés quintra paachiča. Jalla nižta irata nii ana wal kamñinacaqui werar Yooz tawk quintra paača. Nižaza nii ana wal kamñi žoñinacaqui ana zum pinsamintuchiz tsjii kjutñipan chiñiča “Yoozquin kuzziztča” cjcanaqui. Pero zumpacha tantiita cjequiča. Nekztan ninacz ana zuma kuz kjanapacha tjeežta cjequiča, tjapa žoñinacz ninacz puntuquiztan werara zizajo. ⁹Ninacaqui tsjii ratupanikaz ninacz taku walkatasacha. Nekztan žoñinacapachaž ninacz taku zuma tantižcu ninacz ana zuma razunanaca nayaquiča. Jalla nižta watchiča Janetan Jambrestan.

PABLUŽ KAMTANAC PUNTU

¹⁰Amzti weriž tjaa jintanaca zumpacha catokchamča, nižaza weriž kamtanacami zumpacha zizzamča, nižaza weriž kuzquiz tantiitanacami, nižaza weriž Yoozquin kuzziz kamtanacami, nižaza weriž zuma pasinziz kuzziz kamtanacami, nižaza weriž zuma munaziñi kuzziz kamtanacami, nižaza weriž tjurt'iñi kuzziz kamtanacami, ¹¹nižaza žoñinacz wejtquiz chjaajwkatcan kamtanacami, nižaza weriž sufrican kamtanacami. Jalla tjapa weriž kamtanacami zizzamča. Nižaza amqui zumpacha zizza, jaknužt wejtquiz watčhaja Antioquía wajtquizimi, Iconio wajtquizimi, Listra wajtquizimi. Jalla nii watjanacquiziqui

ancha sufrichinča. Jalla nuž sufrichiž cjenami Yooz Jiliriqui wejr liwriichiča tjapa nii sufrisquiztan. ¹²Jalla nižta sufraquiča tjapa criichi žoñinacaqui. Jakzilta criichi žoñinacz Jesucristuž kuzcamapan zuma kamz pecčhaja, jalla nižta sufraquiča tjapa ninacaqui. ¹³Nižaza ana wal kamñi žoñinacami nižaza incallñi žoñinacami tsjan juc'anti ana waliž kamaquiča, žoñinaczquiz incallaquiča, nižaza ninacaqui incallta zakaz cjequiča.

¹⁴Amzti amiž zizta Yooz tawk jaru kamcan tirapan tjurt'iñi kuzziz cjequiča. Nižaza amqui zizza jecčhalaj amquiz tjaa jinch, jalla nii. Nii tjaa jintanaca zumpacha tantižcu, legali Yooz takucamača nii tjaa jintanacaqui, jalla nii tantiyazzamča. ¹⁵Koltallquiztanpacha amqui cjiirta Yooz taku zizzamča. Nii Yooz takuž istutiican, amqui liwriiñi puntu ancha zizñi cjišsamča. Yooz takuqui tjaažja, jaknužt liwriita cječhaja, Jesucristužquiz criichiž cjen, jalla nii. ¹⁶Tjapa nii cjiirta Yooz takuqui Yoozquiztancama ulanchicamača. Jalla nižtquiztan Yooz takuča zuma tjaa jñipanqui, nižaza uj tjeežñiqui, nižaza zuma Yooz jiczquiz ojklajajo azquichñiqui, nižaza tjapa Yooz kuzcama tjaa jñipanqui. ¹⁷Jalla nužupanča Yooz takuqui. Yooz taku zumpacha catokžcuqui, Yoozquin kuzziz žoñinacaqui zumpacha zizñi cjišsa Yooz kamañquizkaz zuma kamzjapa. Nižaza Yooz taku catokžcuqui Yoozquin kuzziz žoñinacaqui zumpacha tjaczi cjišsa, tjapaman walinaca paazjapa.

PABLUŽ CHIIŽINTA TAKU

4 ¹Jesucristo Jiliriqui mantizjapa tjonaquiča. Jalla nuž tjonžcu ticzimi žejtñimi pjalznaquiča.

Jalla niiz̃ yujcquizimi Yooz Ejpž yujcquizimi am chiižinuča, Yooz taku paljayaquičha amqui. ²Nižaza timpuchiz cjicanami ana timpuchiz cjicanami tirapan Yooz tawkžtan žoñinacžquiz chiižinaquičha. Nižaza žoñinacžquiz intintiskataquičha Yooz taku werarača, jalla nii. Nižaza uj paañi žoñinacžquiz Yooz tawkžtan ujznaquičha. Nižaza zumpacha amtayaquičha. Jalla nuž chiižincan, zuma pasinziz kuzzizpan tirapan tjaañnaquičha. ³Tsjii timpuž tjonaquičha. Jalla nii timpuquiz žoñinacaqui zuma Yooz taku tjaañintanaca anaž nonz pecaquičha. Antiz jakzilta tjaañiñit ninacž persun kuz wali cjiskatačhaja, jalla nii tjaañiñinaca nonzkaz pecaquičha. Ninacž persun ana wali razun jaru, jalla nižta tjaañintanaca pecaquičha. ⁴Werar Yooz taku anapanž nonz pecaquičha. Ina žoñž parlakaz nonz pecaquičha. ⁵Amzti zuma werar razunanac jaru tirapan lijituma kamaquičha. Suffricanami zuma tjurt'iñi kuzziz cjequičha. Nižaza zuma liwriñi Yooz taku paljayzquin kuz tjaaquičha. Nižaza amqui Yooziž tjaata kamaña cumplaquičha.

⁶Wejrqui tsjii wilanažtakaz contal cjeeča. Wejt ticz tjuñiqui wajillača. ⁷Zuma zultatužtakaz wejrqui Yoozquin zuma tjurt'iñi kuzzizpan žejlchinča. Nižaza werjqui wejt apóstol oficio zuma cumplichinča. Nižaza tirapan Yoozquin tjapa kuztan criyuča. ⁸Jaziqui arajpachquin ojkc̃cu weriž Yooz kuzcama kamtiquiztan, tsjii zuma premiužtakaz gansjapa tjewznuča. Jesucristo Jiliriča lijituma pjalñiqui. Jalla niiqui niiz̃ pjalz tjuñquiz nii premio wejtquiz tjaaquičha. Anaž wejtquizkaz premio tjaaquičha. Tjapa niiz̃quin kuzziz žoñinacžquiz premio

tjaaquičha. Ninacazakaz niiz̃ tjonz tjuñi ancha tjewža, ancha cherz pecča.

PABLUQUI ZINALLA CARSILQUIZ ŽEJLČHA

⁹Timoteo jila, tsjiillakaz cjesača. Tsjii wiltallami wejr cherzñipan tjonz pecall amqui. Wajilla tjonalla. ¹⁰Demaszi wejr zinalla ecchiča. Tii muntuquiz žejlñi cusasanaca juc'anti pecča. Jalla nekztan wejtquiztan ojkc̃hiča Tesalónica watja ojczjapa. Nižaza Crescentiqui Galacia yokquin ojkc̃hiča. Nižaza Tituzti Dalmacia yokquin ojkc̃hiča. Jaziqui wejtquin tjonalla. ¹¹Lucaskazza wejttan chicaqui. Jaziqui Marcos kjurznaquičha. Nuž wajtžcumi zjiicaquičha amtan. Marcosqui wejtquiz zuma yanapasača Yooztajapa langzquiztan. ¹²Tiquico wejrqui cuchanchinča Efeso wajtquin. ¹³Amqui tjoncan wejt irs caputi zjiicnaquičha. Wejt irs caputi ecchinča Carpos kjuyquiz Troas wajtquin. Nižaza librunaca zjiicnaquičha. Tsjan chekanac wejt papilanaca zjiicnaquičha.

¹⁴Alejandro, nii cobre jirunaca paañiqui ancha wejt quintrā paachiča. Jalla niiz̃ paatiquiztan Yooz Jiliriqui nii casticaquičha. ¹⁵Amqui niiz̃quiztan cuitasaquičha. Niiqui učum paljayta Yooz taku ancha quintrāča.

¹⁶Weriž jilirnacž yujcquiz primera tjurt'iñi tawkžtan chiyā, anaž jecmi wejtquiz tjurt'i yanapchiča. Tjapa wejr zinalla ecchiča. Ninacž ectiquiztan Yoozqui ninaca anakaj casticla. ¹⁷Yooz Jiliriqui wejtquiz yanapchiča. Nižaza wejtquiz zuma tjup kuzziz cjiskatchiča, jalla nižtiquiztan wejrqui liwriñi Yooz taku tirapankal paljayuča, tjapa ana judío žoñinaca nonznajo. Nižaza wejr

conz cjen Yoozqui wejr liwriichiča.

¹⁸Nižaza tjapa ana walinacquiztan wejr liwriyaquiča, nižaza Yoozqui wejr cuitaquiča niiz arajpach wajtquin cjisjapa. Zuma Yoozqui wiñaya wiñaya honorchizkaj cjila. Amén.

¹⁹Tsaanžinalla Priscaquin, nižaza Aquilžquin, nižaza Onesíforuž familianacžquin. ²⁰Erasto cjita jilaqui Corinto wajtquin eclichiča. Trófimo cjita jila jalla nii laa

ecchinča Mileto wajtquin. ²¹Ima

zac timpu luzan tjonžquizpan pecalla. Nižaza amquin tsaanžquiča Eubulo cjita jilami, nižaza Pudente cjita jilami, nižaza Lino cjita jilami, nižaza Claudia cjiti cullacami, nižaza tjapa criichi jilanacami.

²²Jesucristo Jiliriqui amtan chicaj cjilalla, nižaza tjapa ančhucaquiz zumaj wintijla. Amén.